



Vrijednost znanja i učenjaka (Meka)

Hatib: dr. Jasir ibn Rašid ed-Devseri

12. safer 1446. po Hidžri / 16. august 2014.

Hvala Allahu, Koji poučava peru i Koji čovjeka poučava onome što ne zna, Koji nas je uputio u islam i učinio nas najboljim narodom. Svjedočim da nema boga osim Allaha Jedinog, Koji nema druga, i svjedočim da je Muhammed, sallallahu alejhi ve sellem, Njegov rob i poslanik, poslan kao milost svjetovima, neka su Allahov blagoslov, milost i spas na njega, na njegovu porodicu, njegove ashabe, tabiine i one koji ih slijede u dobročinstvu do Sudnjeg dana.

O ljudi, i sebi i vama oporučujem bogobožnost, jer je ona uputa od zablude i spas od neznanja. "I bojte se Allaha, i Allah će vas poučiti." (El-Bekara, 282)

O muslimani, znanje u islamu ima uzvišen status i visoku poziciju, preko koje čovjek postiže najviše stepene dobročinitelja, u baščama ispod kojih teku rijeke. Uzvišeni kaže: "Allah će na visoke stepene uzdignuti one među vama koji vjeruju i kojima je dato znanje." (El-Mudžadela, 11)

Znanje je najbolja stvar u koju su utrošeni život i novac. To je put ka spoznaji Allaha, skrušenosti i poniznosti pred Njim, veličanju Njega i strahu od Njega. Svemogući Allah rekao je: "Allaha se istinski boje od Njegovih robova – učeni." (Fatir, 28)

Za svakoga ko traži uspjeh i spas postoji put, a taj put je postupanje prema pravilima znanja utemeljenog na objavi. Ebu Hurejra, radijallahu anhu, prenosi da je Allahov Poslanik, sallallahu alejhi ve sellem, rekao: "Ko bude išao nekim putem, tražeći znanje, Allah će mu time olakšati put ka Džennetu." (Muslim).

O vjernici! Znanje je život srca, svjetlo spoznaje i uma. Zahvaljujući znanju, ljudi se pokoravaju Allahu, obožavaju Ga, spominju Ga i hvale, održavaju rodbinske veze i razlikuju ono što je dozvoljeno od onoga što je zabranjeno. Traženje znanja čin je pobožnosti, dijeljenje znanja je sadaka (milostinja), a njegovo proučavanje je ibadet.





Kur'ans i sunnet jasno ukazuju na vrijednost znanja i nagrade koja je pripremljena za učene. Uzvišeni kaže: "Zar su isti oni koji znaju i oni koji ne znaju?" (Ez-Zumer, 9), a od Muavije, radijallahu anhu, prenosi se da je rekao: "Čuo sam Vjerovjesnika, sallallahu alejhi ve sellem, da je rekao: 'Kome Allah želi dobro, podari mu razumijevanje vjere.'" (Buhari i Muslim)

O muslimani! Poznavanje Kur'ana i sunneta temelj je na kojem se grade sve druge nauke, a vrsni poznavaoči šerijata su nasljednici vjerovjesnika, i oni su najodabraniji i najčasniji, među vjernicima, povjerljivi imami, predvodnici, svjetionici upute i vodiči, čiji se primjer i mišljenje slijedi u sudbonosnim pitanjima. Ebu Derda, radijallahu anhu, rekao je: "Čuo sam Allahovog Poslanika, sallallahu alejhi ve sellem, da kaže: 'Učenjaci su nasljednici vjerovjesnika, a vjerovjesnici iza sebe nisu ostavili ni dinare, ni dirheme, nego su ostavili znanje, pa ko god ga prihvati, prihvatio je veliko dobro.'" (Ahmed i drugi)

Ko bude išao nekim putem bez potrebnog znanja i pređe stazu života bez spoznaje i razumijevanja, taj je išao teškim putem i tražio je nemoguće. Čovjek ne može donijeti dobrobit svome društvu osim znanjem. Znanjem se gradi slava, podiže civilizacija i predvode narodi, a kad god se neznanje raširi u narodu, ono potkopava njegove temelje, i na kraju to društvo propadne.

Ummete islama! Naša čista vjera, baš kao što je strogo naredila traženje islamskog znanja, također je preporučila stjecanje svjetovnog znanja, koje vodi ka dobrobiti čovjeka i izgradnji i razvoju Zemlje. Uzvišeni kaže: "On vas od Zemlje stvara i daje vam da živite na njoj!" (Hud, 61)

Na ljepotu i savršenstvo ove vjere ukazuje i to što je uspostavila visoke moralne norme i uzvišene principe koji upravljaju životom i znanjem iz svih oblasti, i tako osiguravaju njegovu stabilnost i kontinuitet, kroz ostvarivanje uzvišenih intencija i ciljeva, koje je Svemogući Bog htio. Božiji Poslanik, Allah mu mir i spas darovao, rekao je: "Poslan sam samo da usavršim lijep moral kod ljudi." (Bejheki)





Zato se bojte Allaha i opskrbite se, u što većoj mjeri, korisnim i kvalitetnim znanjima i najsavršenijim moralom, i pridržavajte se puta svoga Gospodara, da bi vam životi bili uspješni, duše čiste i da biste zaslužili zadovoljstvo svoga Gospodara.

Braćo muslimani! Ljetni raspust je pri kraju, odbrojavamo njegove posljednje dane, neki su ga iskoristili, a neki su bili nemarni. Evo nas na pragu nove akademske godine, u kojoj će se nastaviti naše naučno i spoznajno putovanje, a obrazovni proces, nadamo se, krenuti putem napretka, prosperiteta, ponosa i slave.

Znaajte, Allah vam se smilovao, da su obrazovne ustanove stvorene da budu svjetionici upute, vrata prema dobru, unapreditelji znanja, odgajatelji duše i utemeljitelji kreposti. Moramo osjetiti tu veliku odgovornost i ujediniti naše napore da postignemo ove uzvišene i plemenite ciljeve, a fokus našeg djelovanja treba biti na iskrenosti. Ono što se čini u ime Allaha, traje i ne prekida se, a ono što se čini u ime nekog ili nečeg drugog, prekida se i nestaje, jer djela se vrednuju prema namjerama. Ibn Mubarek, Allah mu se smilovao, rekao je: "Prvo znanje je namjera, zatim pomno slušanje, pa razumijevanje, pa pamćenje, pa djelovanje."

Uvaženi učitelji i učiteljice, poučavanje je častan poziv, koji su ponijeli vjerovjesnici, od njih naslijedili učenjaci, a obavljaju ga dobri i čestiti. Blago onima koji ga cijene i znaju njegovo pravo. Obrazovanje je poruka i vi ste njeni nosioci, a u vas se, poslije Uzvišenog Allaha, polažu nade, radi vas se poduzimaju putovanja, u vašim "rukama" su umovi mladih, pa ih obogatite korisnim znanjem, oplemenite sveobuhvatnim savjetima i uložite sve svoje napore u odgajanje generacija u okrilju visokih moralnih vrijednosti, zdravih manira i plemenitih osobina, i usadite u njihova srca odanost Allahu i Njegovom Poslaniku, sallallahu alejhi ve sellem, zatim, pokoravajte se svojim pretpostavljenim, težite jačanju osjećaja pripadnosti domovini, očuvanju njene kulture i ostvarenju njene vizije i težnji.

O svjetionici znanja, vaš Poslanik, sallallahu alejhi ve sellem, bio je blag, nježan, milostiv i samilostan u poučavanju drugih, olakšavao je, a nije otežavao, privlačio je, a nije odbijao. Muavija ibn Hakem, radijallahu anhu, rekao je: "Na mjestu je moga





oca i majke, nikada prije ili poslije njega nisam vidio učitelja koji ljepše poučava od njega, i tako mi Allaha, nije me napao, niti udario, niti uvrijedio." (Muslim)

O očevi i majke, odgajajte svoju djecu da vole znanje i poštuju učenjake, i poučite ih da su lijepi maniri ispred znanja. Imam Malika je njegova majka oblačila u najljepšu odjeću, a zatim mu govorila: "Idi kod Rebie, i nauči od njega lijepe manire, prije znanja."

Znajte, Allah vam se smilovao, da vama pripada najvažnija uloga u odgoju i obrazovanju, jer su vama povjerena vaša i tuđa djeca. Vaš Gospodar kaže: "O vi koji vjerujete, sebe i porodice svoje čuvajte od Vatre čije će gorivo ljudi i kamenje biti" (Et-Tahrim, 6), a Ibn Omer, radijallahu anhumu, prenosi da je Allahov Poslanik, sallallahu alejhi ve sellem, rekao: "Svi ste vi pastiri i svi ste odgovorni za svoje stado." (Muttefekun alejhi)

O učenici i učenice, stigli su dani znanja, pa morate biti marljivi, vrijedni i imati visoke ambicije, da biste postigli ono što želite i na najbolji način iskoristili darove i talente koje vam je Allah dao, uzdigli se na ljestvici znanja i postigli najviše razine, jer ko traži veličinu, žrtvuje ono najveće i najbolje što posjeduje.

O vjernici, donosite salavate i selame na posljednjeg vjerovjesnika, predvodnika bogobojaznih i najboljeg učitelja, to vam je naredba od Allaha u Njegovoj jasnoj Knjizi: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

